

摘藻堂四庫全書薈要

子部

欽定四庫全書薈要

子部

御製律呂正義後編卷一百十



詳校官主事

臣

陳木

欽定四庫全書薈要卷一萬一千四十六

子部

御製律呂正義後編卷一百十

樂章考十八

宴饗



金元

明

金燕饗樂章

金史曰世宗大定九年十一月庚申皇太子生日上宴於東宮命奏新聲謂大臣曰朕製此曲名君臣樂今天下無事與卿等共之不亦樂乎辭律不傳十三年四月乙亥上御睿思殿命歌女直詞顧謂皇太子曰朕思先朝所行事未嘗暫忘故時聽此詞亦欲令汝輩知女直醇質之風至於文字語言或不通曉是忘本也二十五年幸上京宴宗室於皇武殿飲酒樂

上諭之曰昔漢高祖過故鄉與父老歡飲擊筑而歌
令諸兒和之彼起布衣尚且如是況我祖宗世有此
土今天下一統朕巡幸至此何不樂飲於時宗室婦
女起舞進酒畢羣臣故老起舞上曰吾來故鄉數月
矣今迴期已近未嘗有一人歌本曲者汝曹來前吾
為汝歌乃命宗室子叙坐殿下者皆上殿而聽上歌
至慨想祖宗音容如覩悲感不復成聲歌畢泣下數
行右丞相元忠暨羣臣宗戚捧觴上壽皆稱萬歲於

是諸老人更歌本曲如私家相會暢然歡洽上復續
調歌曲留坐一更極歡而罷案其詞皆道祖宗創業
艱難及所以繼述之意然煩音促節殊非正大和平
之響因取金史所載殿庭樂歌著於篇

大定七年上冊寶樂章

案金史皇帝受冊寶前期大樂令與協律郎設樂
縣於殿廷又設舉麾位二一於殿西階一於樂縣
西北又設登歌樂架於殿上至日侍中奏外辦宮

縣樂作皇帝乃出即坐樂止奉寶入門樂作置褥
位上樂止初引時宮縣樂作至位立定樂止寶初
行樂作至御前置訖樂止皇帝受寶訖樂作侍奏
稱賀樂止皇太子升殿登歌樂作復位樂止侍中
奏禮畢宮縣樂作皇帝還幕次樂止此受冊寶大
樂作止之次序也其樂名曲辭更案其次而詳之
大定七年正月上冊寶皇帝將升御座宮縣樂太
族宮奏泰寧之曲降座同冊寶入門奏天保報上

之曲奉冊寶官將復班位奏歸美揚功之曲冊寶
初行奏和寧之曲冊寶將升殿皇太子自侍立位
至降階曲並同皇太子升殿賀奏同心戴聖之曲
上壽皇帝將升御座宮縣奏和寧之曲辭同前舉
酒奏萬壽無疆之曲皇太子升階降階及與宴官
升殿並奏和寧之曲辭同前進第一爵登歌奏王
道明昌之曲行羣官酒宮縣奏和寧之曲文舞入
設羣官食奏功成治定之舞三成止進第二爵登

歌奏天子萬年之曲行羣官酒宮縣奏和寧之曲
武舞入設羣官食奏四海會同之舞三成止進第
三爵登歌奏嘉禾之曲行羣官酒設羣官食羣官
降階宮縣奏和寧之曲皇帝將降御座奏泰寧之
曲並用太簇宮除相同者外凡十一章章八句

皇帝將升御座宮縣樂太簇宮奏泰寧之曲

降座

同

德隆帝位承天而興侯邦來庭民居安寧歸美以報傳

之無極鴻名徽稱壽時萬億

冊寶入門奏天保報上之曲

四方既平功歸聖明定功巍巍不享鴻名股肱良哉掄
揚元首儲精優游南山等壽

奉冊寶官將復班位奏歸美揚功之曲

聖德高明萬邦咸休錙銖唐虞糠粃商周維時羣臣對
敷稽首天子明明令聞不朽

冊寶初行奏和寧之曲

四方攸同昭哉成功時和年豐諸福來崇英聲昭騰和
氣充塞於乎皇王維壽時億

冊寶將升殿皇太子自侍立位至降階

曲並同前

皇太子升殿賀奏同心戴聖之曲

穆清皇風遐方來同於昭于天物和歲豐不受鴻名對

揚闕三字 釐穰穰敷錫罔極

上壽皇帝將升御座宮縣奏和寧之曲

辭同前

舉酒奏萬壽無疆之曲

四海太平吾皇之功羣臣對揚誕受鴻名霞觴瓊腴君
王樂豈皇天垂休萬壽無極

皇太子升階降階及與宴官升殿並奏和寧之曲

辭同前

進第一爵登歌奏王道明昌之曲

對天鴻休予以鋪張巍巍煌煌超冠百王皇圖皇綱時
維明昌祉福無窮於民敷揚

行羣官酒宮縣奏和寧之曲文舞入設羣官食奏

功成治定之舞三成止

聖德高明如天強明多方治平功大有成流於聲音形於蹈舞頌觴羣臣以昭禮遇

進第二爵登歌奏天子萬年之曲

惟明后馭寰瀛躋升平飛英聲功三皇德五帝游巖廊觴萬歲

行羣官酒宮縣奏和寧之曲武舞入設羣官食奏四海會同之舞三成止

地平天成時和歲豐迺衡弗迷率惟敕功受天之祐四方來賀於萬斯年不遐有佐

進第三爵登歌奏嘉禾之曲

景命赫斯歸吾皇仁風洋洋被遠荒琛贄旅庭趨明光
氣和薰蒸為嘉祥殊本合穗真異常庾如坻京歲且穰
猗歟鴻休超前王播為聲詩傳無疆

行羣官酒設羣官食羣官降階宮縣並奏和寧之

曲

皇帝將降御座奏泰寧之曲並用太簇宮

辭同前

大定十一年行冊禮樂章

案大定十一年十一月行冊禮皇帝陞御座宮縣
奏泰寧之曲冊寶入門奏天保報上之曲奉冊寶
官將復班位奏歸美揚功之曲皇太子升殿賀奏
同心戴聖之曲舉酒奏萬壽無疆之曲進第一爵
登歌奏王道昌明之曲設羣官食奏和寧之曲功
成治定之舞第二爵登歌奏天子萬年之曲行羣

官酒奏和寧之曲四海會同之舞第三爵登歌奏
嘉禾之曲凡十章章八句

皇帝升御座宮縣奏泰寧之曲

皇皇穆穆袞服玉趾如日之升如山仰止九賓在列媚
茲天子願言無疆介以繁祉

冊寶入門奏天保報上之曲

穆穆元聖天迪子保相維臣工以闕丕號揚於路朝玉

牒神寶於萬斯年吾君壽考

奉冊寶官將復班位奏歸美揚功之曲

玉冊玉寶尊聖天子丕揚鴻名昭受帝祉闋休對天其
隆孰比臣下同心翼戴歸美

皇太子升殿賀奏同心戴聖之曲

大矣我后徽冊膺受歡趨彤庭拜手稽首休明御辰無
疆萬壽靈眈沓來天地長久

舉酒奏萬壽無疆之曲

聖德懋昭民歸天祐煌煌金書典冊光受備樂在庭

闋

三字
奏羣公奉觴天子萬壽

進第一爵登歌奏王道昌明之曲

明明我皇道光化溥百度維新禮修樂舉闕飾太平爛
然可覩超躋三王暉映千古

設羣官食奏和寧之曲功成治定之舞

穆穆我君威折羣醜輝光日新仁洽九有容典歲蕤超
前絕後端拱深嚴寶冊膺受

進第二爵登歌奏天子萬年之曲

典禮修惟明后揚鴻名燦瓊玖羅華紳為萬壽歌南山
堅且久

行羣官酒奏和寧之曲四海會同之舞

道隆政平天開有德萬國和寧來王來極昭受鴻名俯
徇列辟錫飲行觴歡心各得

進第三爵登歌奏嘉禾之曲

衆瑞畢至昭升平爰生嘉禾乃合穗膺膺大田無南東
稼茂如雲成豐歲既刈既穫百室盈擊壤歌沸野老聲

陶唐之民茲其比帝力何有若自遂

大定十八年上受命寶樂章

案大定十八年十二月上受命寶皇帝將升御座
宮縣奏泰寧之曲並大呂宮寶入門奏天保報上
之曲羣臣合班奏歸美揚功之曲皇太子升殿并
自侍立位降階宮縣奏稱觴介壽之曲舉酒登歌
奏萬壽無疆之曲凡五章章八句

皇帝將升御座宮縣奏泰寧之曲並大呂宮

上帝有赫懷此明德畀之神寶庸鎮萬國臨軒是膺登
降維則羣臣拜手年卜萬億

寶入門奏天保報上之曲

受命大寶昭答眷祐珍符明貺人為天授文物具舉韶
護迭奏羣臣上之天子萬壽

羣臣合班奏歸美揚功之曲

德冒生民明明元后端冕臨軒神寶是受羣工來賀咸
拜稽首無疆無期享祚長久

皇太子升殿并自侍立位降階宮縣奏稱觴介壽
之曲

上儀昭舉膺時瑞玉羣辟在列蹌蹌肅肅袞衣桓圭歸
美稽首升降惟時天子萬壽

舉酒登歌奏萬壽無疆之曲

上帝眷命純休滋至誕膺洪寶大臨大器稱觴對揚高
嶽萬歲其寧惟永無疆卜世

天德二年冊立中宮樂章

案天德二年十月冊立中宮皇帝將升御座宮縣
奏乾寧之曲降座同冊寶入門奏昌寧之曲出門
同將受冊寶以冊寶入門宮縣奏肅寧之曲命婦
升降同后出閣奏順寧之曲升降座同受冊奏坤
寧之曲凡五章章八句

皇帝將升御座宮縣奏乾寧之曲

降座同

人道大倫王道所基明聖稽古陰教欲施臨軒發冊備
舉彝儀麟趾關雎宜播聲詩

冊寶入門奏昌寧之曲

出門同

羽衛充庭淑旂徽章禮儀具舉涓辰以良相我內訓來
儀椒房億萬斯年邦家之光

將受冊寶以冊寶入門宮縣奏肅寧之曲

命婦升

降同

塗山興夏關雎美周坤儀之尊母臨九州瑤冊褱衣光
配凝旒地久天長福祿是邁

后出閣奏順寧之曲

升降座同

天立厥配任如比隆母儀四海化行六宮日月並明乾坤合德於萬斯年作儷宸極

受冊奏坤寧之曲

風化之始由於壺闈禮文斯備爰正坤儀維順以慈儷聖同德則百斯男垂統無極

天德四年冊皇太子樂章

案天德四年二月冊皇太子皇帝將升御座宮縣奏乾寧之曲皆用夾鐘宮冊使入門奏昌寧之曲

皇太子入門奏元寧之曲出門同凡三章章八句

皇帝將升御座宮縣奏乾寧之曲

皆用夾鐘宮

大君有為先圖本固涓辰之吉禮成儲副文物備陳聲樂皆具人心載寧克昌福祚

冊使入門奏昌寧之曲

在天成象煥乎前星惟聖時憲典禮以行一人有慶萬邦以貞社稷之福寢昌寢明

皇太子入門奏元寧之曲

出門同

皇矣上帝純佐明聖篤生元良日躋德性冊命主器萬邦以正龍樓問寢億年之慶

大定八年冊皇太子樂章

案大定八年正月冊皇太子皇帝將升御座宮縣奏洪寧之曲並用太族宮皇太子入門奏肅寧之曲羣臣合班奏嘉寧之曲皇太子復受冊位奏和寧之曲凡四章章八句

皇帝將升御座宮縣奏洪寧之曲

並用太族宮

會朝清明臨軒備禮天威皇皇臣工濟濟於昭元良膺
茲典冊對揚闋休卜年萬億

皇太子入門奏肅寧之曲

光昭前星惟天垂象稽古而行主器以長曲禮告成邇
遐屬望國本既隆繁釐永享

羣臣合班奏嘉寧之曲

於皇臨軒禮崇上嗣維眷之祺縹方正位言觀其儀翔
翔濟濟美歸吾君太平萬歲

皇太子復受冊位奏和寧之曲

祖功艱難經營締構基牢根深枝繁葉茂於昭貽謀駢
休集祐元良斯貞吾皇萬壽

大定二十七年冊皇太孫樂章

案大定二十七年三月冊皇太孫皇帝將升御座
宮縣奏泰寧之曲並姑洗宮皇太孫入門奏慶寧
之曲出門同羣臣合班奏順寧之曲皇太孫復受
冊位奏保寧之曲凡四章章八句

皇帝將升御座宮縣奏泰寧之曲

並用姑洗宮

上天叢休申錫祚允孫謀有貽臨軒體正煌煌上儀欣
欣衆聽隆我邦本無疆惟慶

皇太孫入門奏慶寧之曲

出門同

寶源流光流光惟遠孫謀有貽慶序昭衍於樂衆望於
皇備典動容周旋承茲嘉善

羣臣合班奏順寧之曲

冕旒當宁徽章備舉綵仗充庭金石列虞濟濟多士翼

翼就序海潤山暉傾聽樂府

皇太孫復受冊位奏保寧之曲

禮之攸聞丕建世嫡衆論協從天心不易名崇震宮辭
著瑞冊社稷宗廟無疆夷懌

元燕饗樂章

元史禮樂志止載郊祀宗廟樂章其及於燕饗者則
有宴樂之器如笙箏琵琶火不思之類又有樂隊樂
音王隊元旦用之壽星隊天壽節用之禮樂隊朝會

用之所謂長春柳新水令沽美酒太平令等曲元史
不載其辭今亦莫可考也

明燕饗樂章

明史曰凡聖節正旦冬至大朝賀和聲郎陳樂於丹
墀百官拜位之南北向駕出仗動和聲郎舉麾奏飛
龍引之曲樂作升座樂止偃麾百官拜奏風雲會之
曲拜畢樂止丞相上殿致詞奏慶皇都之曲致詞畢
樂止百官又拜奏喜昇平之曲拜畢樂止駕興奏賀

聖朝之曲還宮樂止百官退和聲郎樂工以次出凡宴饗和聲郎四人總樂舞二人執麾立樂工前之兩旁二人押樂立樂工後之兩旁殿上陳設畢和聲郎執麾由兩階升立於御酒案之左右二人引歌工樂工由兩階升立於丹陛上之兩旁東西向舞師二人執旌引武舞士立於西階下之南又二人執翽引文舞士立於東階下之南又二人執幢引四夷舞士立於武舞之西南俱北向武舞曰平定天下之舞文舞

曰車書會同之舞四夷舞曰撫安四夷之舞引大樂
二人執戲竹引大樂工陳列於丹陛之西文武二舞
樂工列於丹陛之東四夷樂工列於四夷舞之北俱
北向駕將出仗動大樂作升座樂止進第一爵和聲
郎舉麾唱奏舉臨濠之曲引樂二人引歌工樂工詣
酒案前北面重行立定奉畢偃麾押樂引衆工退第
二奏開太平之曲第三奏安建業之曲第四奏削羣
雄之曲第五奏平幽都之曲第六奏撫四夷之曲第

七奏定封賞之曲第八奏大一統之曲第九奏守承
平之曲其舉麾偃麾歌工樂工進退皆如前儀進第
一次膳和聲郎舉麾唱奏飛龍引之樂大樂作食畢
樂止偃麾第二奏風雲會之樂第三奏慶皇都之樂
第四奏平定天下之舞第五奏賀聖朝之樂第六奏
撫安四夷之舞第七奏九重歡之樂第八奏車書會
同之舞第九奏萬年春之樂其舉麾偃麾如前儀九
奏三舞既畢駕興大樂作入宮樂止和聲郎執麾引

衆工以次出案此洪武初所定朝賀宴饗之樂歌節次也厥後數有更定詳著於篇

洪武三年定朝賀樂章

案洪武三年定朝賀樂章升殿奏飛龍引之曲百官行禮奏風雲會之曲丞相致詞奏慶皇都之曲復位百官行禮奏喜昇平之曲還宮奏賀聖朝之曲凡五章

升殿奏飛龍引之曲

千載中華生聖主王氣成龍虎提劍起淮西將勇師雄
百戰收強虜驅馳鞍馬經寒暑將士同甘苦次第靜
風塵除暴安民功業如湯武

百官行禮奏風雲會之曲

玉壘瞰江城風雲繞帝營駕樓船龍虎縱橫飛礮發機
驅六甲降虜將勝胡兵談笑掣長鯨三軍勇氣增壹
戎衣宇宙清寧從此華夷歸一統開帝業慶昇平

丞相致詞奏慶皇都之曲

虎踞龍蟠佳麗地真主開基千載風雲會十萬雄兵屯
鐵騎臺臣守將皆奔潰一洗煩苛施德惠里巷謳歌
田野騰和氣王業宏開千萬世黎民咸仰雍熙治

百官行禮奏喜昇平之曲

持黃鉞削平荆楚清吳越清吳越暮秦朝晉幾多豪傑
幽燕齊魯風塵潔伊涼蜀隴人心悅人心悅車書一
統萬方同轍

還宮奏賀聖朝之曲

天運推遷虜運移王師北討定燕畿百年禮樂重興日
四海風雲慶會時除暴虐撫瘡痍漠南爭覩舊威儀
君王聖德容降虜三恪衣冠拜玉墀

洪武二十六年更定朝賀樂章

案洪武三年已定朝賀樂章二十六年更定升殿
韶樂奏聖安之曲還宮韶樂奏定安之曲公卿入
門奏治安之曲凡三章治安曲後不用

升殿韶樂奏聖安之曲

乾坤日月明八方四海慶太平
龍樓鳳閣中扇開簾捲
帝王興聖感天地靈保萬壽
洪福增祥光王氣生升寶
位永康寧

還宮韶樂奏定安之曲

九五飛聖龍千邦萬國敬依從
鳴鞭三下同公卿環珮
響玕璫掌扇護御容中和樂音
律濃翡翠錦繡擁還華
蓋赴龍宮

公卿入門奏治安之曲

後不用

忠良為股肱昊天之恩承主恩森羅拱北辰御爐烟遶
奉天門江山社稷興安天下軍與民龍虎會風雲

洪武二十六年中宮朝賀樂章

案洪武二十六年定中宮正旦冬至千秋節朝賀
樂章天香鳳韶之曲一章

中宮天香鳳韶之曲

寶殿光輝晴天映懸玉鉤珍珠簾櫳瑤觴舉時簫韶動
慶大筵來儀鳳昭陽玉帛齊朝貢讚孝慈賢助仁風歌

謠正在昇平中謹獻上齊天頌

宣德以後增定慈宮朝賀樂章

案中宮后也慈宮皇太后也宣德以後增定慈宮
朝賀樂章蓋亦正旦冬至千秋節所用天香鳳韶
之曲一章

天香鳳韶之曲

龍樓鳳閣彤雲曉開繡簾天香芬馥瑤階春暖千花簇
壽聖母齊頌祝御筵奏獻長生曲坤道寧品類咸育和

氣四時調玉燭享萬萬年太平福

洪武三年燕饗樂章

案洪武三年定燕饗樂章有九奏焉明史云前三奏和緩中四奏壯烈後二奏舒長其曲皆按月律謹案九奏之名一奏起臨濠之曲名飛龍引二奏開太平之曲名風雲會三奏安建業之曲名慶皇都四奏削羣雄之曲名喜昇平五奏平幽都之曲名賀聖朝以上五曲已見朝賀樂章六奏撫四夷

之曲名龍池宴七奏定封賞之曲名九重歡八奏
大一統之曲名鳳凰吟九奏守承平之曲名萬年
春凡九章

一奏起臨濠之曲名飛龍引

二奏開太平之曲名風雲會

三奏安建業之曲名慶皇都

四奏削羣雄之曲名喜昇平

五奏平幽都之曲名賀聖朝

按以上五曲已見前朝賀樂章茲不復贅

六奏撫四夷之曲名龍池宴

海波不動風塵靜中國有真人文身交趾氎裘金齒重
譯來賓奇珍異產梯山航海奉表稱臣白狼玄豹九
苞丹鳳五色麒麟

七奏定封賞之曲名九重歡

乾坤清廓論功定賞策勲封爵玉帶金符貂蟬簪珥形
圖麟閣奉天洪武功臣佐興運文經武畧子子孫孫

尊榮富貴久長安樂

八奏大一統之曲名鳳凰吟

大明天子駕飛龍開疆宇定王封江漢遠朝宗慶四海
車書會同東夷西旅北戎南越都入地圖中遐邇暢
皇風億萬載時和歲豐

九奏守承平之曲名萬年春

風調雨順遍乾坤齊慶承平時節玉燭調和甘露降遠
近桑麻相接偃武修文報功崇德率土皆臣妾山河磐

固萬方黎庶歡悅 長想創業艱難君臣曾共掃四方
豪傑露宿宵征鞍馬上歷盡風霜冰雪朝野如今清寧
無事任用須賢哲躬勤節儉萬年同守王業

十二月按律樂歌

按十二月樂歌殆朝會宴饗通用之樂當其月
則用其月之律耳正月太簇本宮黃鐘商俗名
大石曲名萬年春二月夾鐘本宮夾鐘宮俗名
中呂曲名玉街行三月姑洗本宮太簇商俗名

大石曲名賀聖朝四月仲呂本宮無射徵俗名
黃鐘正徵曲名喜昇平五月蕤賓本宮姑洗商
俗名中管雙調曲名樂清朝六月林鐘本宮夾
鐘角俗名中呂角曲名慶皇都七月夷則本宮
南呂商俗名中管商角曲名永太平八月南呂
本宮南呂宮俗名中管仙呂曲名鳳凰吟九月
無射本宮無射宮俗名黃鐘曲名飛龍引詞同
前起臨濠之曲十月應鐘本宮姑洗徵俗名中

呂正徵曲名龍池宴十一月黃鐘本宮夷則角
俗名仙呂角曲名金門樂十二月大呂本宮大
呂宮俗名高宮曲名風雲會凡十二章九月一
章詞同前起臨濠不贅

正月

奉天承運秉黃麾志在安民除慝曾覩中天騰王氣五
色虹霓十尺龍繞兕觥螯神迎艘艦嘉應非人力鳳凰山
上慶雲長繞峯石 天助神武成功人心効順所至皆

無敵手握乾符開寶祚畧定山河北飲馬江淮列營
河漢四海風波息師雄將猛萬方齊仰威德

二月

山林豺虎中原狐兔四海英雄無數大明真主起臨濠
震於赫戎衣一怒星羅玉壘雲屯鐵騎一掃乾坤煙
霧黎民重覩太平年慶萬里山河磐固

三月

雲氣朝生芒碭間虹光夜起鳳凰山江淮一日真主出

華夏千年正統還 瞻日角覩天顏雲龍風虎競追攀
君臣勤苦成王業王業汪洋被百蠻

四月

風雲密濠梁千載真龍出真龍出鯨鯢豺虎掃除無迹
江河從此波濤息乾坤同慶承平日承平日華夷萬
里地圖歸一

五月

中原鹿走英雄起回首四郊多壘英主倡兵淮水將士

皆雄偉 百靈護助人心喜一呼萬人風靡談笑掃除
螻蟻王業從此始

六月

王氣呈祥飛紫鳳虎嘯龍興千里旌旗動四海歡呼師
旅衆天戈一指風雲從 將士爭先民樂用駕御英雄
聖德皆天縱率土華夷歸職貢詞臣拜獻河清頌

七月

鳳凰佳氣好王師起義乾坤初曉淮水西邊五色慶雲

繚繞三尺龍泉似水更百萬貔貅熊豹軍令悄魚麗鵠
鸛風雲蛇鳥糾糾電掣鷹揚在伐罪安民去殘除暴
天與人歸豪傑削平多少萬里煙塵淨洗正紅日一輪
高照膺大寶王業萬年相保

八月

紫微翠蓋擁蓬萊聖天子帝圖開歷數應江淮看五色
雲生上台櫛風沐雨攻堅擊銳將士總英才躍馬定
塵埃創萬古山河壯哉

九月

詞同前起臨濠之曲故不復贅

十月

大明英主承天運倡義擁天戈星辰旋繞風雲圍護龍
虎麾訶旌旗所指羌夷納款江海停波從今平定萬
年疆宇百二山河

十一月

慶皇明聖主開寶祚起臨濠正汝潁塵飛江淮浪捲赤

子呼號天戈奮然倡義擁神兵百萬總英豪貔虎朝屯
壁壘虹霓夜繞弓刀 鳳凰山勢聳層霄佳氣五雲高
愛士伍同心君臣協力不憚勤勞風雲一時相會看魚
龍飛舞出波濤靜掃八方氛祲咸聽九奏簫韶

十二月

天眷顧淮西真人起布衣正乾剛九五龍飛駕馭英雄
收俊傑承永命布皇威 一劍立鴻基三軍擁義旗望
雲霓四海人歸整頓乾坤除暴虐歌聖德慶雍熙

武舞文舞四夷舞樂章

案明史曰武舞曰平定天下之舞象以武功定
禍亂也文舞曰車書會同之舞象以文德致太
平也四夷舞曰撫安四夷之舞象以威德服遠
人也夫有舞必有歌曲以和之武舞曲名青海
宇文舞曲名泰階平四夷舞曲有四章其一名
小將軍其二名殿前歡其三名慶新年其四名
過門子凡六章

武舞曲名清海宇

拔劍起淮土策馬定寰區王氣開天統寶歷慶乾符武
畧文謨龍虎風雲創業初將軍星繞弁勇士月彎弧選
騎平南楚結陣下東吳跨蜀驅胡萬里山河壯帝居

文舞曲名泰階平

乾坤清寧治功告成武定禍亂文致太平郊則致其禮
廟則盡其誠卿雲在天甘露零風雨時若百穀登禮樂
雍和政刑肅清儲嗣既立封建乃行讒佞屏四海賢俊

立朝廷玉帛鐘鼓陳兩楹君臣賡歌揚頌聲

四夷舞曲

其一曲名小將軍

大明君定宇寰聖恩寬掌江山東虜西戎北狄南蠻手
高擎寶貝盤

其二曲名殿前歡

五雲宮闕連霄漢金光明照眼玉溝金水聲潺潺頤
觀趨蹌看儀鑾嚴肅百千般威人心膽寒

其三曲名慶新年

虎豹關文武斑五彩間慶雲朝霞燦黃金殿喜氣增丹
墀內仰聖顏翠繞紅圍錦繡班高樓十二欄笙簫趁紫
壇仙音韻瑤簫按拜舞齊歌謠讚吾皇萬壽安

其四曲名過門子

定宇寰定宇寰掌江山撫百蠻謳歌拜舞仰祝讚萬萬
年帝業安

洪武十五年重定燕饗樂章

案洪武三年已定燕饗九奏此復更定一奏炎精
開運之曲二奏皇風之曲三奏眷皇明之曲奏撫
安四夷之舞曲名小將軍殿前歡慶新年過門子
詞俱同前四奏天道傳之曲奏車書會同之舞曲
名泰階平詞同前五奏振皇綱之曲六奏金陵之
曲七奏長楊之曲八奏芳醴之曲九奏駕六龍之
曲進膳曲水龍吟太平清樂曲有三一太清歌二
上清歌三開天門迎膳奏水龍吟之曲與進膳同

升座還宮百官行禮奏萬歲樂朝天子二曲與朝
賀同大祀慶成大宴用萬國來朝隊舞纓鞭得勝
隊舞萬壽聖節大宴用九夷進寶隊舞壽星隊舞
冬至大宴用讚聖喜隊舞百花聖朝隊舞正旦大
宴用百戲蓮花隊舞勝鼓采蓮隊舞舞詞史俱不
載載歌詞凡十一章

一奏炎精開運之曲

炎精開運篤生聖皇大明御極遠紹虞唐河清海晏物

阜民康威加夷獠德被戎羌八珍有薦九鼎馨香鼓鐘
鑄鑄宮徵洋洋怡神養壽理陰順陽保茲遐福地久天
長

二奏皇風之曲

皇風被八表熙熙聲教宣時和景象明紫宸開繡筵龍
袞曜朝日金爐裊祥煙濟濟公與侯被服麗且鮮列坐
侍丹宸磬折在周旋羔豚升華俎玉饌充方圓初筵奏
南風繼歌賡載篇瑤觴欣再舉拜俯禮無愆同樂及斯

辰於皇千萬年

奏平定天下之舞曲名清海宇

詞同前

三奏眷皇明之曲

赫赫上帝眷我皇明大命既集本固支榮厥本伊何育
德春宮厥支伊何藩邦以寧慶延百世澤被羣生及時
為樂天祿是膺千秋萬歲永觀厥成

奏撫安四夷之舞曲名小將軍殿前歡慶新年過

門子

曲詞俱同前

四奏天道傳之曲

馬負圖兮天道傳龜載書兮人文宣義畫卦兮禹疇叙
皇極建兮合自然綿綿歷數歸明主祥麟在郊威鳳舞
九夷入貢康衢謠聖子神孫繼祖武垂拱無為邁前古

奏車書會同之舞名泰階平

詞同前

五奏振皇綱之曲

周南詠麟趾卷阿歌鳳凰藹藹稱多士為楨振皇綱赫
赫我大明德尊踰漢唐百揆修庶績公輔理陰陽我冠

正襟佩都俞在高堂坐令八紘內熙熙民樂康氣和風
雨時田疇見豐穰獻禮過三爵歡娛良未央

六奏金陵之曲

鐘山蟠蒼龍石城踞金虎千年王氣都於今歸聖主六
代繁華經幾秋江流東去無時休誰言天塹分南北英
雄豈但嗤曹劉我皇昔住濠梁屋神遊天錫真人服提
兵乘勢渡江來詞臣早獻江南曲歌金陵進珍饌諧八
音繼三歎請觀漢祖用兵時為嘗馮異淳沱飯

七奏長楊之曲

長楊曳綠黃鳥和鳴
菡萏呈鮮紫燕輕盈
千花浥露日麗風清
及時為樂芳尊在庭
管音嘒嘒絲韻泠泠
玉振金聲各奏爾能
皞皞國老載勸載懲
明德惟馨垂之聖
經唐風示戒永保嘉
名無已太康哲人是
聽

八奏芳醴之曲

夏王厭芳醴商湯遠
色聲聖人示深戒千
春垂令名惟皇登九
五玉食保尊榮日昃
不遑餐布德延羣生
天庖

具豐膳鼎鼐事調烹豈但資肥甘亦足養遐齡達人悟
茲理恒令五氣平隨時知有節昭哉天道行

九奏駕六龍之曲

日麗中天漏下遲公卿侍宴多令儀簫韶九奏觴九獻
爐煙細逐祥風吹羣臣舞蹈天顏喜歲熟民康長若此
六龍迴駕鳳樓深寶扇齊開扶玉几景星呈瑞慶雲多
兩曜增輝四序和聖人道大如天地歲歲年年奈樂何
進膳曲水龍吟

寶殿祥雲紫氣濛聖明君龍德宮氤氲霧靄檜栢間青
松龍樓鳳閣雕梁畫棟此是蓬萊洞

太平清樂曲

其一太清歌

萬國來朝進貢仰賀聖明主一統華夷普天下八方四
海南北東西託聖德勝堯王保護家國太平天下都歸
一將兵器銷為農器旌旗不動酒旗招仰荷天地

其二上清歌

一願四時風調雨順民心喜攝外國將寶貝攝外國將寶貝見君王來朝寶殿裏珊瑚瑪瑙玻璃進在丹墀

其三開天門

託長生日月光天德萬萬歲永固皇基公卿文武來朝會開玳筵捧金盃

永樂十八年定宴饗樂舞曲詞

案永樂十八年定宴饗樂舞一奏上萬壽之曲平定天下舞曲其一四邊靜其二刮地風二奏仰天

恩之曲黃童白叟鼓腹謳歌承應曲曰豆葉黃四
夷舞曲其一小將軍其二殿前歡其三慶豐年其
四渤海令其五過門子三奏感地德之曲車書會
同舞曲其一新水令其二水仙子四奏民樂生之
曲表正萬邦舞曲其一慶太平其二武士歡其三
滾繡毬其四陣陣贏其五得勝回其六小梁州五
奏感皇恩之曲天命有德舞曲其一慶宣和其二
窄鞦兒六奏慶豐年之曲七奏集禎應之曲八奏

永皇圖之曲九奏樂太平之曲導膳迎膳進膳及
升座還宮百官行禮諸曲俱與洪武間同大祀慶
成用纓鞭得勝蠻夷隊舞萬壽聖節九夷進寶隊
舞冬至節譜聖喜隊舞正旦節百戲蓮盆隊舞隊
舞詞不載載舞曲詞凡二十七章

一奏上萬壽之曲

龍飛定萬方受天命振紀綱彞倫攸叙四海康普天率
土盡來王臣民舞蹈嵩呼載揚稱觴奉吾皇聖壽天長

平定天下舞曲

其一四邊靜

威服千邦四夷來賓納表章顯禎祥承乾象皇基永昌
萬載山河壯

其二刮地風

聖主過堯舜禹湯立五常三綱八蠻進貢朝今上頓首
誠惶朝中宰相變理陰陽五穀收成萬民歡暢賀吾皇
齊讚揚萬國來降

二奏仰天恩之曲

皇天眷聖明五辰順四海寧風調雨順百穀登臣民鼓舞樂太平賢良在位邦家永禎吾皇仰洪恩夙夜存誠黃童白叟鼓腹謳歌承應曲曰豆葉黃

雨順風調五穀收成倉廩豐盈大利民生託賴著皇恩四海清鼓腹謳歌白叟黃童共樂咸寧

四夷舞曲

其一小將軍

順天心聖德誠化番邦盡朝京四夷歸伏舞於龍廷貢
皇明寶貝擎

其二殿前歡

四夷率土歸王命都來仰大明萬邦千國皆歸正現庭
朝仁聖天階班列衆公卿齊聲歌太平

其三慶豐年

和氣增鸞鳳鳴紫霧生祥雲朝霞映熱金爐香味馨列
丹墀御駕盈絃管蕭韶五音應龍笛間鳳笙

其四渤海令

金盃中酒滿盛御案前列羣英君德成皇圖慶嵩呼萬
歲聲

其五過門子

聖主興聖主興顯威靈蠻夷靜至仁至德至聖明萬萬
年帝業成

三奏感地德之曲

皇心感地靈順天時德厚生含宏光大品物亨鍾奇毓

秀產俊英河清海晏麟來鳳鳴陰陽永和平相我文明
車書會同舞曲

其一新水令

錦衣花帽設丹墀俱公服百司同會麟至舞鳳來儀文
武班齊朝賀聖明帝

其二水仙子

八方四面錦華夷天下蒼生仰聖德風調雨順昇平世
遍乾坤皆讚禮託君恩民樂雍熙萬萬年皇基堅固萬

萬載江山定體萬萬歲洪福天齊

四奏民樂生之曲

世間的萬民荷天地感聖恩乾坤定位四海春君臣父子正大倫皇風浩蕩人心載醇熙熙樂天真永戴明君表正萬邦舞曲

其一慶太平

姦邪濁亂朝綱構禍難煽動戈斨赫怒吾皇親征灞上指天戈敵皆降

其二武士歡

白溝戰場旌旗雲合迷日光令嚴氣張三軍踴躍齊奮
揚掃除殘甲如風蕩凱歌傳四方仁聖不殺降望河南
失機槍

其三滾繡毬

肆旅拒恃力强一心構殃築滄洲百尺城隍騁萬毒恣
虎狼孰能禦當順天心有德隆昌倒戈歛甲齊歸撫降
將生還達故鄉自此仁聞愈彰

其四陣陣羸

不數孫吳兵法良神謀睿算合陰陽八陣堂堂行天上
虎畧龍韜孰敢當俘囚十萬皆疎放感荷仁恩戴上蒼
其五得勝回

兩旁四方展鳥翼風雲雁行出奇兵敵難量士強馬強
遍百里眠旌卧鎗勝兵回樂洋洋

其六小梁州

敵兵戰敗神魂喪擁貔貅直渡長江開市門肆不移宣

聖恩如天曠綸音頒降普天下仰吾皇

五奏感皇恩之曲

當今四海寧頌聲作禮樂興君臣慶會躋太平衣冠濟
濟宴彤庭文臣武將共荷恩榮忠心盡微誠仰答皇明
天命有德舞曲

其一慶宣和

雨順風調萬物熙一統華夷四野嘉禾感和氣一榦百
穗一榦百穗

其二窄甄兒

梯航萬國來丹陛
太平年永固洪基
正東西南北來朝
會洽寰宇布春暉
四夷咸賓聲教美
自古明王在慎德
不須威武服戎狄
祥瑞集鳳來儀佳
期萬萬歲聖明君
主華夷

六奏慶豐年之曲

萬方仰聖君大一
統撫萬民豐年時
序雨露均穰穰五
穀貨財殷酣歌擊
壤風清俗淳四夷
悉來賓正統皇仁

七奏集禎應之曲

皇天眷大明五星聚兆太平騶虞出現甘露零野蠶成
繭嘉禾生醴泉湧地河水清乾坤萬萬年四海永寧

八奏永皇圖之曲

天心眷聖皇正天位撫萬邦仁風宣布禮樂張戎夷稽
首朝明堂皇圖鞏固賢臣贊勳太平日月光地久天長
九奏樂太平之曲

皇恩被八紘三光明四海清人康物阜歲屢登含哺鼓

腹皆歡聲民歌帝力唐堯至仁乾坤永清其樂太平

嘉靖間慶成宴樂章

嘉靖間續定慶成宴樂章升座樂曲萬歲樂百官
行禮樂曲朝天子上護衣上花樂曲水龍吟一奏
上萬歲之曲奏平定天下舞曲其一四邊靜其二
鳳鸞吟二奏仰天恩之曲迎膳曲水龍吟進膳曲
水龍吟進湯曲其一太清歌其二上清歌其三開
天門奏黃童白叟鼓腹謳歌承應曲御鑾歌三奏

感昊德之曲奏撫安四夷舞曲其一賀聖朝其二
殿前歡其三慶豐年其四新水令其五太平令四
奏民樂生之曲迎膳曲水龍吟進膳曲水龍吟進
湯曲太清歌奏車書會同舞曲其一新水令其二
水仙子五奏感皇恩奏表正萬方舞曲其一慶太
平其二千秋歲其三滾繡毬其四殿前歡其五天
下樂其六醉太平六奏慶豐年七奏集禎應八奏
永皇圖九奏樂太平迎膳曲水龍吟進膳曲其一

水龍吟其二太清歌奏天命有德舞曲其一萬歲
樂其二賀聖朝奏纓鞭得勝蠻夷隊舞承應曲其
一醉太平其二看花會其三天下樂其四清江引
奏致詞曲其一清江引其二千秋歲宴畢百官行
禮曲朝天子還宮曲萬歲樂凡四十九章
升座樂曲萬歲樂

五百昌期嘉慶會啓聖皇龍飛天位九州四海重華日
大明朝萬萬世

百官行禮樂曲朝天子

滿前瑞煙香繞蓬萊殿風回韶律鼓淵淵列陸上旌旗
絢日至朱躔陽生赤甸氣和融徹上元歷年萬千長慶
天宮宴

上護衣上花樂曲水龍吟

寶殿金爐瑞靄浮陳玉案列珍羞天花炫彩照耀翠雲
裘鸞歌鳳舞虞廷樂奏萬歲君王壽

一奏上萬歲之曲

聖主垂衣裳興禮樂邁虞唐簫韶九成儀鳳凰日月中
天照八荒時和歲康上奉萬年觴允祚無疆

奏平定天下舞曲

其一四邊靜

天啓嘉祥聖主中興振紀綱頌洋洋功蕩蕩國運隆昌
萬歲皇圖壯

其二鳳鸞吟

維皇上天祐聖明景命宣五雲輝三台潤七緯光懸協

氣生嘉祥見正萬民用羣賢垂袞御經筵宵衣勤政殿
禮園丘大祀精虔明水潔蒼璧圓秉周文承殷薦眷皇
家億萬斯年

二奏仰天恩之曲

皇穹啓聖神欽乾運祇郊禋一陽初動霽先春萬福來
同仰至仁祥開日月瑞見星辰禮樂協神人宇宙咸新
迎膳曲水龍吟

春滿雕盤獻玉桃葭管動日輪高燾微霽色遙映袞龍

袍千官舞蹈鈞韶迭奏曲度昇平調

進膳曲水龍吟

紫禁瓊筵暖應冬驂八螭乘六龍玉卮瓊斚黼座獻重
瞳堯天廣運舜雲飛動喜聽賡歌頌

進湯曲

其一太清歌

長至日開黃道喜乾坤佳氣陽長陰消奏鈞韶音調鳳
軫律協鸞簫仰龍顏天日表如舜如堯金爐烟暖御香

飄玉墀晴霽祥光繞宮梅苑柳迎春好燕樂蓬萊島

其二上清歌

雲捧宸居五星光映三台麗仰日月層霄霽仰日月層霄霽中興重見唐虞際太和元氣自陽回兆姓歡愉

其三開天門

九重霄日轉皇州曉宴天家共歌魚藻龍鱗雉尾高祝聖壽慶清朝

奏黃童白叟鼓腹謳歌承應曲御鑾歌

雅奏樂昇平瞻絳闕集瑤京黃童白叟喜氣盈謳歌鼓
舞四海寧金枝結秀玉樹含英聽康衢擊壤聲帝力難
名

三奏感昊德之曲

帝德運光明一陽動萬物生升中大報蒼璧陳禮崇樂
暢歌太清星懸紫極日麗璇庭乾坤瑞氣盈海宇安寧
奏撫安四夷舞曲

其一賀聖朝

華夷一統萬國來同獻方物修庭貢遠慕皇風自南自
北自西自東望天宮佳氣鬱重重四靈畢至麟鳳龜龍
其二殿前歡

瑞雲晴靄浮宮殿一朧陽和轉禮成交泰開周宴鳳笙
調龍幄展天心感格人歡忭四海謳歌徧

其三慶豐年

賴皇天錫豐年勤禹稼力舜田喜慰三農願嘉禾秀瑞
麥鮮賦九州貢八埏神倉御廩咸充滿養民以養賢

其四新水令

聖德精禋格昊穹大一統四夷來貢玉帛捧文軌同世
際昌隆共聽輿人頌

其五太平令

誕明禋天鑒元后光四表惠澤周流來四裔趨前擁後
獻萬寶充庭滿園稽首頓首天高地厚祝聖人多男福
壽

四奏民樂生之曲

大報禮初成象乾德運皇誠神州赤縣永清寧靈雨和
風樂太平陰陽交暢品物咸亨元化自流行允殖羣生
迎膳曲水龍吟

五色祥雲捧玉皇開闔闔坐明光鈞天樂奏冬日御筵
張文恬武熙太平氣象人在唐虞上

進膳曲水龍吟

玉律陽回景運新燕鎬京藹皇仁光昭雲漢一氣沸韶
龔錦瑟和聲瑤琴清韵瞻仰天顏近

進湯曲太清歌

萬方民樂時雍鼓舞荷天工雷行風動喜今逢南蠻北
貊東夷西戎來朝貢大明宮星羅斗拱九重天上六飛
龍五色雲間雙彩鳳普天率土效華封允協河清頌

奏車書會同舞曲

其一新水令

五雲深護九重城感洪恩一人有慶陽初長禮方行帝
德文明表率邦家正

其二水仙子

萬方安堵樂康寧九域同仁賀聖明
千年撫運承天命露垂甘河獻清見
雙岐秀麥連莖喜靈雪隨冬應覩祥
雲拂曙生神與化並運同行

五奏感皇恩之曲

雙闕五星光霓旌樹紫蓋張璇臺玉歷轉新陽
鈞天廣樂諧宮商恩深露湛喜溢霞觴日月煥
龍章地久天長奏表正萬方舞曲

其一慶太平

維天眷我聖明禮圜丘至德精誠乾元永清洪膺景命
休徵應泰階平

其二千秋歲

聖主乘龍御萬邦慶雲翔化日重光羣臣拜舞稱壽觴
載歌天保章

其三滾繡毬

五雲車度九重利見飛龍耀宸章火藻華虫擊虎啟考

鳧鐘鼉鼓逢逢八珍列九鼎豐隆堯眉揚彩舜重瞳萬
國咸熙四海雍齊歌頌聖德神功

其四殿前歡

萬年禮樂中興日大化覩重熙河清海宴臻祥瑞五行
順七政齊超三邁五貞元會既醉頌鳧鷖

其五天下樂

萬靈朝拱接清都享南郊欽天法祖願聖人承乾納祐
中和位育龜獻範馬陳圖

其六醉太平

禮樂萬年規謳歌四海熙衣冠蹈舞九龍墀麗正仰南
離紫雲高捧唐虞帝垂衣天下文明治鎬烏岐鳳呈嘉
瑞真個是人在成周世

六奏慶豐年之曲

聖人懋承乾綏萬邦屢豐年神倉御廩登天田明粢鬱
鬯祀孔虔輿情咸豫協氣用宣萬古帝圖傳璧合珠聯
七奏集禎應之曲

天保泰階平寶露降渾河清嘉禾秀麥集休徵遐陬絕
域喜氣盈一人有慶百度惟貞萬國頌咸寧麗正重明
八奏永皇圖之曲

鴈燕集天京頌魚藻歌鹿鳴邊陲安堵萬國寧重譯來
庭四海清咸池日曙昧谷雲征帝座仰前星豫大豐亨
九奏樂太平之曲

皇極永登祥乾符啓泰運昌玉管回春動一陽金鑒錫
燕歌九章虞庭獸舞岐山鳳翔日麗袞龍裳主聖臣良

迎膳曲水龍吟

香霧氤氲紫閣重仰天德瞻帝容星輝海潤甘雨間和
風樂比鳶魚瑞呈麟鳳永獻卷阿頌

進膳曲

其一水龍吟

萬戶千門啓建章台階峻帝座張三垣九道北斗玉衡
光元氣調和雅韻鏗鏘昭代慶明良

其二太清歌

萬方國盡來庭稽首歌帝仁仰荷生成振乾綱陰陽順
序民物樂生逢明聖萬年春永膺休命華夷蠻獠咸歸
正蒼生至老不知兵鼓腹含哺囿太平九有享清寧

奏天命有德舞曲

其一萬歲樂

太平天子興隆日履初長陽回元吉醴泉芝草休徵集
曾聞道五星聚室

其二賀聖朝

一人元良百度維新握赤符凝玄應享太清大禮方行
祀事孔明感天心億載恒承慶明王慎德四裔咸賓
奏纓鞭得勝蠻夷隊舞承應曲

其一醉太平

星華紫殿高雲氣彤樓繞九夷重譯梯航到皇圖光八
表玉宇無塵明月皎銀河自轉扶桑曉平平蕩蕩歸王
道百獸舞鳳鳴蕭韶

其二看花會

普天下都賴吾皇至聖看玉關頻歛天山已定四夷效
順歸王命天保歌羣黎百姓

其三天下樂

九重樂奏萬花開望龍樓雲蒸霧靄仰天工雍熙帝載
臣民歡戴溥仁恩遍九垓

其四清江引

黃鐘既奏陽和長德盛天心貺人文日月明國勢山河
壯衢室民謠頻擊壤

奏致詞曲

其一清江引

鈞天畢奏日方中
既奏歡聲動雲章
傍袞龍颺勢翔威
鳳萬方安樂興嘉頌

其二千秋歲

上下交歡燕禮成一陽奮萬彙咸亨
風雲會合開明運
紫極轉璇衡

宴畢百官行禮曲朝天子

文班武班歡動承明殿禮成樂備頌聲喧真咫尺仰天
顏日照龍筵風回雉扇翠旌旋奉仙鑒雲間斗間五色
金章燦

還宮曲萬歲樂

天回北極雲成瑞望層霄重華日麗九垓八極樂雍熙
祝聖壽萬萬歲

永樂間小宴樂章

案冬至正旦聖壽節此謂大宴外此如端午中秋

重陽等宴皆小宴也永樂間定小宴樂章一奏本
太初之曲朝天子二奏仰大明之曲歸朝歡三奏
民初生之曲其一沾美酒其二太平令四奏品物
亨之曲醉太平五奏御六龍之曲其一清江引其
二碧玉簫六奏泰階平之曲十二月七奏君德成
之曲其一十二月其二堯民歌八奏聖道行之曲
其一金殿萬年歡其二得勝令九奏樂清寧之曲
其一普天樂其二沾美酒其三太平令凡十五章

明史云右二奏至八奏俱奏百戲承應第九奏魚躍于淵承應奉天門宴百官止用本太初仰大明民初生三奏曲其進酒進膳樂同惟百官叩頭禮用朝天子曲宴畢導駕還宮用御鑾歌案此亦永樂間所定其朝天子御鑾歌等曲詞前已有之故不載

一奏本太初之曲朝天子

混兮沌兮水土成元氣不分南北與東西未辨天和地

萬象包涵其中秘密難窮造化機是陰陽本體乃為之
太極兩儀因而立

二奏仰大明之曲歸朝歡

太極分混然方始見儀形清浮濁偃乾坤定日月齊興
昭青霄萬象明陽須動陰須靜陰與陽皆相應流行二
氣萬物俱生

三奏民初生之曲

其一沾美酒

乾坤清宇宙寧六合淨四維正萬象原來一氣生定三才五行民與物共成羣

其二太平令

為一類不分人品竟生食豈曉庖烹避寒暑巢居穴遁披樹葉相尋趣如何是愛親世情治生雖混然各安其性

四奏品物亨之曲醉太平

黎民生世間萬物長塵寰陰陽交運轉循環久遠時庶

繁相傳氣候應無間品物交錯憑誰鑒望聖人出世整
江山主萬民得安

五奏御六龍之曲

其一清江引

人心久仰生聖君天使人生聖聖人受天機體天居中
正御六龍聖明登九重

其二碧玉簫

君坐神京海嶽共從新民仰君恩聖治有人倫人品分

萬物增聖承乾百福臻垂法明尊天命興後朝皆從正
六奏泰階平之曲十二月

聖乃有言天天是無言聖聖人臨正萬物亨通恩威盛
社稷安仁德盛江山定選用英賢興王政分善惡賞罰
均平三公九卿左右股肱庶事康寧

七奏君德成之曲

其一十二月

皇基以興聖帝脩身奉天體道聖德愈明敬天地勤勞

萬民立法度上下咸寧

其二堯民歌

風俗禮樂厚彝倫爰興學校進儒經賢臣良將保朝廷
四野人民頌歡聲用的是賢英賢英定太平寰海皆歸
正

八奏聖道行之曲

其一金殿萬年歡

三綱既定九疇復興聖道如天嘉禾齊秀寒暑和平聖

威無邊皇基穩勝磐石慶雲生景星長見三光輝耀百
穀收成萬姓安寧

其二得勝令

聖德感皇乾甘露降山川萬邦來朝貢奇珍擺布金玉
階下鳴鞭仰聖主升金殿丹墀列英賢讚吾皇豐稔年
九奏樂清寧之曲

其一普天樂

萬邦寧皇圖正父君母后天下咸欽君治外永聖明后

治內長安靜後聖承乾皆從正德相傳聖子神孫天威
浩蕩江山永固洪福無窮

其二沽美酒

和氣生滿玉京祥煙起映皇宮明聖開基整萬民風雲
會帝庭奏簫韶九韻成

其三太平令

紫霧隱金鸞彩鳳祥光罩良將賢臣玉案列珍羞美醞
寶鼎熬龍涎香噴至尊永寧儲嗣守成賀萬萬歲一人

有慶

嘉靖間仁壽宮落成宴饗樂章

案詩有斯干之詩築室既成而燕飲以落之并言
居是室者兄弟相好祖妣似續復及其生子之祥
所謂善頌善禱也儀禮曰下管新宮大射儀曰乃
新宮三終左傳昭二十五年宋公享叔孫昭子賦
新宮新宮者即斯干詩也然則因宮之新而落成
宴饗亦古禮歟嘉靖間仁壽宮落成宴饗樂章一

奏本太初之曲朝天子二奏仰大明之曲殿前歡
三奏民初生之曲其一沽美酒其二太平令四奏
品物亨之曲醉太平五奏御六龍之曲其一清江
引其二碧玉簫進膳曲其一水龍吟其二太清歌
其三上清歌其四開天門凡十一章
一奏本太初之曲朝天子

帝誠帝明寶位基昌命仙苑開筵歌鹿鳴亭殿天章映
我有嘉賓鼓瑟吹笙示周行昭德音日升月恒萬載皇

圖正

二奏仰大明之曲殿前歡

天保定聖人多壽多男慶修和禮樂協中興麗正重明
如山阜如岡陵如川方至莫不增協氣生禎祥應百神
受命萬國來庭

三奏民初生之曲

其一沾美酒

黃河清寶露凝瑞麥呈靈鵲鳴諸福來同仰聖明喜萬

寶告成占景緯泰階平

其二太平令

念農桑衣食之本仰君德獨厚民生事耕鑿羣黎百姓
歌鹿鳴神人胥慶明主宴嘉賓承筐鼓瑟吹笙繼自今
福增天定

四奏品物亨之曲醉太平

瑤宮怡聖顏閭苑隔人寰吹笙鼓瑟賓旨酒天開宴鹿
鳴歌舞黃金殿賴吾皇錫福萬民安醉歌天保歡

五奏御六龍之曲

其一清江引

聖主有道樂昇平宴會延休慶務本軫民生鴻化凝天
命欣落成萬載開宏運

其二碧玉簫

帝重農桑法駕起明光麟遊鳳翔宴陳天保章開玳筵
薦瑤觴既醉頌洋洋聖德巍巍皇恩蕩世際唐虞上

進膳曲

其一水龍吟

寶瑟瑤笙鼓吹喧聖天子御華筵南山萬壽瑞日正中
天百穀豐年八方珍膳人樂昇平宴

其二太清歌

祥麥嘉禾臻瑞仰荷堯舜主愛育羣黎感天意五風十
雨秋報春祈徧爾德勸農桑日用飲食嘉賓和樂開筵
地紅雲捧雕盤珍味山呼萬歲福無疆日升川至

其三上清歌

仰賴吾皇參天兩地凝和氣四三王六五帝國家興賢
才為上瑞養萬民九域熙百祿咸宜

其四開天門

寶殿輝龍虎風雲會瞻丹陛覲紫微周詩歌既醉螽斯
麟趾開祥瑞仰飛龍在天位

幽風亭宴講官樂章

案幽風亭在西苑宴講官於此者案大明會典國
初經筵無定日亦無定所正統初始著為儀累朝

因之每月初二十二二十二謂之月講每日止用
講讀官內閣學士侍班不用侍衛侍儀執事等官
講說經史謂之日講月講日講今不可考殆講後
宴之耶一奏本太初之曲朝天子二奏仰大明之
曲殿前歡三奏民初生之曲其一沾美酒其二太
平令四奏品物亨之曲醉太平五奏御六龍之曲
其一清江引其二碧玉簫進膳曲其一水龍吟其
二太清歌其三上清歌其四開天門凡十一章

一奏本太初之曲朝天子

九重詔傳殿閣開秋宴授衣時節肅霜天禾稼登場徧
鼓瑟吹笙昇平重見工歌七月篇春酒當筵獻願吾皇
萬年歲歲臨西苑

二奏仰大明之曲殿前歡

鳳苑御筵開黃花映玉階鹿鳴天保歌三代古調新裁
奉君王萬壽盃日月明乾坤大看年年秋報賽太平有
象元首明哉

三秦民初生之曲

其一沽美酒

熙春陽化日長報懿筐采柔柔拾繭繅絲有萬箱染紅
黃孔陽為公子製衣裳

其二太平令

勤樹藝歲年豐穰九十月禾黍登場為春酒甕浮新釀
村田樂齊歌齊唱饗公堂殺羊舉觴繼進著兕觥祝聖
壽萬靈扶相

四奏品物亨之曲醉太平

納嘉禾滿場釀御酒盈缸公桑蠶績製元黃服龍衣袞
裳僉斯蟋蟀諧清唱水光山色明仙仗幽風亭殿進霞
觴祝聖壽無疆

五奏御六龍之曲

其一清江引

九月風光何處有鳳苑在龍池右農夫稼已登公子衣
方授萬歲君王頻進酒

其二碧玉簫

凡我生民農桑最苦辛終歲經營氣候變冬春田畯欣
婦子勤詠幽詩仰化鈞場圃新風雨順宴御墀龍顏近
進膳曲

其一水龍吟

養老休農啟御筵瀉春酒介耆年剗羊剪韭社鼓正闌
闌香粳米顆升堂拜獻此樂真堪羨

其二太清歌

九月天開西苑宸居無逸殿講幄張筵集儒流雲蒸星
炫壁緯珠躔睹御製煥天章昭回雲漢堯天舜日民安
晏御廩神倉百穀登金輝玉燦休徵見大有豐年

其三上清歌

鳳苑宸居公桑帝藉今方舉躬耕蠶勸士女獻羊羔升
堂奏樂舞葵葢棗壺上珍廚萬壽山呼

其四開天門

幽風亭共仰吾皇聖百穀登萬國咸寧民康物阜禎祥

應仰乾運俯坤靈

嘉靖間皇后親蠶宴內外命婦樂章

案月令曰鳴鳩拂其羽戴勝降於桑具曲植籩筐
后妃齋戒親東鄉躬桑蠶事既登分繭稱絲效功
以共郊廟之服此皇后親蠶與天子親耕禮並重
也嘉靖間皇后親蠶宴內外命婦樂章升座奏天
香鳳韶之曲進膳曲沽美酒回宮御鑾歌凡三章
升座奏天香鳳韶之曲

春雲繚繞芳郊曙喜乾坤萬象咸舒蘭皋蕙圃迎仙馭
采桑條攀茂樹蠶宮繭館親臨御壁月珠星照太虛開
筵還駐翠旂旗萬載垂貞譽

進膳曲沽美酒

蠶禮成鳳輦停薦霞觴列雲屏宮妃世婦仰坤寧祥雲
映紫冥同頌耀前星

回宮御鑾歌

惟天啓聖皇君耕藉后躬桑身先田職率萬邦天清地

寧民阜康百穀用成四夷來王治化登虞唐世發禎祥
永樂間定東宮燕樂章

案賈誼論保傳有言曰天下之命懸於太子太子
之善在於早諭教與選左右夫教得而左右正則
太子正矣太子正而天下定矣又曰太子既冠成
人免於保傅之嚴則有記過之史徹膳之宰進善
之旌誹謗之木敢諫之鼓瞽史誦詩工誦箴諫大
夫進謀士傳民語習與智長故切而不愧化與心

成故中道若性今定東宮宴樂章亦瞽史誦詩之
遺意庶無或以淫聲導之乎一奏喜千春之曲賀
聖朝二奏永南山之曲水仙子三奏桂枝香之曲
蟾宮曲四奏初春曉之曲小梁州五奏乾坤泰之
曲滿庭芳六奏昌運頌之曲喜秋風右二奏至六
奏俱奏百戲承應七奏春道開之曲沽美酒其二
太平令迎膳樂曲水龍吟升座還宮百官行禮奏
千秋歲曲凡十章

一奏喜千春之曲賀聖朝

開國承天聖感極多總一統封疆潤百姓快活萬物榮
光共沐恩波仙音韻合讚昇平詠歌齊朝拜千千歲東
宮滿國春和

二奏永南山之曲水仙子

洪基永固海波清盛世明時禮樂興華夷一統江山靜
民通和樂太平讚東宮仁孝賢明秉鈞衡端正順乾坤
泰亨坐中華萬世昌寧

三奏桂枝香之曲蟾宮曲

曉光融宴饗春宮日朗風和嘉氣葱葱鎮領台樞規宏
網憲禮節至公事聖上柔聲婉容問安寧勤孝虔恭果
斷寬洪剛健文明聖德合同

四奏初春曉之曲小梁州

端拱嚴宸事紫微秉運璇璣四時百物總相宜仰賴明
君德大業勝磐石皇儲仁孝明忠義美遐方順化朝儀
孝能歡慈愛心敬篤上尊卑意禮上和下睦民鼓舞樂

雍熙

五奏乾坤泰之曲滿庭芳

春和玳筵安邦興國欽聖尊賢文英武烈於民便禮樂
成全享大業中庸不偏順天常節儉為先達文獻嚴儀
訓典孝敬億千年

六奏昌運頌之曲喜秋風

文武安軍民樂宴文華會班僚五雲齊動鈞天樂賀春
宮讚聖朝

七奏泰道開之曲沽美酒

布春風滿畫樓對嘉景鳳凰洲高捧金波碧玉甌設威儀左右分品從列公侯

其二太平令

效聖上誠心勤厚主宗器嚴備春秋諧律呂仙音齊奏
欽王政皇天保佑拜舞頓首讚祝進酒千千歲康寧福
壽

迎膳樂曲水龍吟


方響笙簧鼓樂喧排寶器開玳筵鸞儀旌節錦繡景相
連簪纓趨進皆來朝見春滿文華殿

升座還宮百官行禮奏千秋歲曲

朔望朝參同

舜日勝禹周慶雲生繚繞鳳樓風調雨順五穀收
萬民暢歌謳

御製律呂正義後編卷一百十



總校官庶吉士臣張能照

校對官中書臣馮培

謄錄監生臣魏鎔